

# Datti in gen politic?

Ina psicoterapeuta e politica dat resposta

CUN MARIA MEYER-GRASS  
HA DISCURRÌ CLAUDIA CADRUVI / ANR

■ En l'America datti ils Clinton's ed ils Bush's. Ma er il Grischun ha sias dinastias politicas. En il cussegl grond sesan blers cusrins e cusrinas u deputads che han antenats ch'eran gia en il parlament. La deputada Maria Meyer-Grass (pld/Claustra) è psicoterapeuta ed explitgescha il fenomen ord vista psicologica.

*Datti ina disposiziun genetica per far politica?*

Maria Meyer-Grass: Il fatg che tants uffants d'antierius politichers sesan en il cussegl grond na pon ins betg manar enavos sin in gen politic. I dat facturs psicologics, sco per exempel ils raschies en davos maissa, che influenzeschan ils uffants. Ozendi mussa era la neurologia che las experienschas en la famiglia furman ils giuvenils. Cun talas experienschas pon ins svegliar la sensibilitad e l'allertadad dals giuvenils per la politica.

## Il bab ha gí grond plaschair

*Sche blers deputads han gí babs, tats u barbas en la politica, ha quai pia plitost raschuns psicologicas?*

I sa tracta da influenzas (Prägungen). Quai vesa la neurologia oz er uschia. En mintga cas han ils babs – e mintgant er las mammas – da l'ultima generaziun influenzà, els han manà natiens nus e fatg gust a nus da politisar. In exempel è mia vischina *Susanne Krättli-Lori*. Cura ch'ella è s'exponida per l'emprima giada politicamain, hai jau pudì observar, co il bab dad ella – in anteriur deputà – ha gí grond plaschair.

*Pertge fan ils uffants savens il medem*



La psicologa e deputada Maria Meyer-Grass (pld/Claustra) descriva ils avantatgs da las iertas politicas: **Ils geniturs sveglian il regl politic tar ils figls e las figlas.**

FOTO O. ITEM

*sco ils geniturs? Quai datti gea era tar ils purs u medis.*

fins e van in'otra via – gist era politica-main.

*Per exempel il socialdemocrat Sascha Müller. Ses bab ha fatg politica en la pld. Müller è dentant in'exceptiun en il Grischun, nua ch'ils uffants stattan fidaivels a la lingia dals babuns. Pertge na rebelleschan els betg dapli?*

*Elmar Ledergerber è stà ditg president da la citad da Turitg. Sia figlia na politisescha betg en la ps, mabain tar ils verdliberals. Quai n'è nagut aparti per Turitg.*

## Il bab e la mamma sco model

Dad ina vart datti l'identificaziun, nua ch'uffants emprendan insatge dal bab u da la mamma sco model (Vorbild). Els han uschia in access pli simpel, saja quai a la politica perquai ch'ins sa co'i marscha, u ad ina clamada perquai ch'ins sa tge ch'è impurtant là. Ma i dat er il cuntrari che uffants tschentan cun-

En las valladas n'avain nus betg ina cuntrada politica uschè differenziada. Perquai vegn ins tar nus pli svelten empruvament dad cuntinuar las vias cumprovadas.

*A Turitg fissi pli simpel da politisar en in'otra partida ch'il bab u la mamma?*

## Empruvament da cuntinuar vias cumprovadas

*En valladas grischunas è quai pli grev?*

Jau hai fatg suandanta experienscha:

Sche nus da la pld dumandain la gliud da vegnir en nosa partida, daud jau mainsvart: «Vus essas ina partida simpatica, ma mes bab u tat è adina stà en la partida da purs e mastergn.» I capita pia anc savens ch'ins s'identifitgescha insaco cun il «clan». A mi èsi era crudà si ch'ì dat da preschent en il cussegl grond blers cusrins, cusrinas e zavrinas.

## Famiglia ha ferma influenza

*Era a Berna politiseschan trais politichers ord dinastias politicas da noss chantun. Han els forsa tuttina insaco la politica en il saun?*

Anc ina giada. Gist sch'jau pens vi da *Andrea Hämmerle*, *Brigitta Gadiant* ed *Eveline Widmer-Schlumpf* – jau enconusch tuts trais pulit bain – croda si a mi ina gronda allertadad. Quai è insatge ch'ins acquista gia baud durant l'uffanza. Jau crai ch'ins senta ch'igl è vegni politisà intensivamain en davos maissa en questas trais famiglia. Igl è da sentir ina ferma influenza (Prägung). En quest senn han els la politica en il saun.

*Il contact en l'uffanza ha sveglià l'interess ed il regl politic?*

Ins ha quasi fullà via neurologicamain, uschia che las energias flessegian pli tgunsch en quests vials.

*Ha questa influenza er in aspect negativ, in aspect unilateral?*

Sch'jau ves ils politichers giuvenils, ves'jau ch'ils avantatgs e dischavantatgs gultiveschan in l'auter. Dad ina vart datti forsa gia baud ina influenza per ina direcziun, da l'otra vart evochescha la politisaziun questa gronda allertadad.

## Placi Berther:

### «Ins sa co'i va»

■ (anr/vi) Politica è insatge dal tuttafatg normal per *Placi Berther* (pcd/Tujetsch). Ses bab e tat èn gia stads presidents communal e deputads. Er il tat davart da la mamma è stà preschenta. Che gia ses antenats han fatg politica na saja betg la raschun principala ch'el haja candidà per il cussegl grond. Ma entras il bab ed ils tats saja la politica vegnida personalisada ed «ins sa co che quai va. E sche quels han gia fatg politica, daco betg era jau?».

D'uffant haja el dudì inqual discussiun e gia baud cumenzà a leger las gasettas – cun auters eglis che ses camerats, di Berther. Tgi che creschia si en ina famiglia nunpolitica fetschia probabel dapli quitads da surpigliar in uffizi. Insatge che haja parents en la politica sappia che la politica pertutgia tuttas chaussas dal mintgadi.

## Bab e figl a medem temp fiss lubì

Teoreticamain dastga in'entira famiglia politisar en il cussegl grond. La lescha na scumonda betg quai. Il 2008 èn ina giada bab e figl stads ensemen en il parlament. Igl è stà durant la sessiun d'avust il 2008. Lezza giada aveva il suppleant Livio Zanetti (pcd/Tschintg Vitgs) da substituir in deputà. Ses bab Tino Zanetti è stà deputà per Poschiavo en l'ultima legislatura. El sa regorda: «Igl è stà interessant d'observar tge ch'il figl fa e co ch'el agescha.» Ma per in'entira legislatura n'avev Tino Zanetti betg vulì esser cun il figl en parlament. Omadus fissan en la medema partida, en la medema fracziun ed i existess – senza vulair – ina controlla permanenta. «Jau hai ponderà e pensà che quai n'è betg ideal.» Cura che ses figl ha decidì da candidar sco deputà per questa legislatura, ha Tino Zanetti decidì da cha-

lar. El haja la finala politisà set onns sin champ chantunal.

I na saja stà nagina tactica electorala, aschunta il bab. Els avessan candidà per dus differents circuls – per Poschiavo e per ils Tschintg vitgs. Ch'ils dus Zanettis fissan bab e figl n'avev gi nagina influenza negativa sin las vuschs dals votants en ils dus circuls allontanads, manegia Tino Zanetti.

Tenor la lescha è ina candidatura da parents lubida, conferma Domenic Gross dal secretariat dal cussegl grond. Pertutgant parantellas existia en la lescha dal cussegl grond sulet la clausla da recusaziun (Ausstand). Lezza prescriba che deputads ston prender recusaziun sch'il cussegl grond u ina cumissiun tracta in conclus nua ch'il deputà sez, ses conjugal, in quina u in parent fin il segund grad ha in interess privat direct.



Livio Zanetti



Tino Zanetti

## Cusrinas, zavrinas, babs, tats e basats

Ina gronda part dals 120 deputads han parents che han fatg politica communal u regionala. Sin questa glista sa chattan sulet ils deputads cun perdavants ch'èn stads en il cussegl grond. La glista sa basa sin indicaziuns dals schefs da fracziun. Ella n'è probabel betg cumpletta. Dal remiment: Da preschent politiseschan plirs cusrins e cusrinas en il cussegl grond. Martin Aebi (pbd/Engiadin'Ota) è cusrin da Ruth Frigg (ps/Cuira). Gabriela Tomaschett (pcd/Cadi) e cusrina da Placi Berther (pcd/Cadi). Duri Bezzola (pld/Engiadin'Ota) ha gist dus cusrins, numnadamain Duri Campell (pbd/Engiadin'Ota) e Jon Domenic Parolini (pbd/Suot Tasna). Angela Casanova (pld/Razèn) è zavrina d'Elita Florin (pcd/Razèn). Bruno Claus (pld/Cuira) è cusrin da Giatgen Peder Fontana (pld/Surses).

Deputà, partida, circol	parent	anteriur deputà, partida
Vincent Augustin, pcd, Cuira	bab	Pius Augustin
Placi Berther, pcd, Cadi	tat	Vigeli Berther, conservativ
	bab	Vigeli Berther, pcd
Andrea Davaz, pps, Maiavilla	basat	Johann Georg Fromm, liberal
	basat	Johannes Kunz, liberal
Andreas Felix, pbd, Tschintg Vitgs	bab	Florian Felix, pps
Walter Grass, pbd, Tusaun	bab	Wieland Grass, pps
Elita Florin, pcd, Razèn	bab	Joachim Caluori, pcd
Jann Hartmann, pld, Cuira	bab	Reto Hartmann, pld
Christian Kasper, pld, Luzein	bab	Peter Kasper, pld
Susanne Krättli, pld, Maiavilla	bab	Christian Lori, pld
Rudolf Kunz, pld, Cuira	bab	Romano Kunz, pld
Elisabeth Mani, pbd, Tavau	tat	Thomas Heldstab, democrat
Urs Marti, pld, Cuira	barba	Bruno Tscholl, pbd
	barba	Christian Aliesch, pps
Gian Michael, pbd, Schons	tat	Steafan Michael, democrat
Sascha Müller, ps, Tavau	bab	Reto Müller, pld
Hannes Parpan, pcd, Alvaschein	tat	Ilario Simonet
Vera Stiffler, pld, Cuira	mamma	Sina Stiffler, pld
Luca Tenchio, pcd, Cuira	bab	Ettore Tenchio, pcd
Gabriela Tomaschett, pcd, Cadi	tat	Vigeli Berther, conservativ
Livio Zanetti, pcd, Tschintg Vitgs	bab	Tino Zanetti, pcd
Duri Campell, pbd, Engiadin'Ota	bab	Riet Campell, democrat